

Platt partu:

Rundbreef 2024-05

Moderdag

De Festlichkeit to Moderdag
is wat, wat ok en Doder mag!
Dat Fröhstück warrt de Moder bracht –
Dat is, wat hüüt mien Broder macht;
ik haal de Blööm för Moder ran –
se sitt ja hier an't Roder, Mann!
Dorüm: Stell di mit Moder good!
Denn herrscht hier Freed un goder Moot.

Moinmoin, leve plattdüütsche Maten un Frünnen!

Naja, grammatisch nich ganz so astrein, de Schüddelriemel baven, man schiet op! :-) Ja, de [Moderdag](#) weer een vun de schönen Fierdaag in'n Maimaand, Meike Balzer-Fraun denkt geern an [all Moderdaag trüch, de se beleevt hett](#) – as Dochter un as Moder. De annern Festen in düssen fierdaagrieken Maand weern [Himmelfohrt](#) un [Pingsten](#). Wunner sünd nu mööglich: [Steerns drisselt op de Eer daal](#), de [Pingstbööm wasst in'n Heven](#), de [Ferien lockt al, ok wenn'n nich veel Geld utgeven kann](#); un dör düsse heimliche Wunnertied twüschen Lent un Sommer föhrt uns Hans-Hermann Briese [mit en niege Folg Vertellsels un Riemels](#), wedder mit Oginaalbillen utstatt.

Man de Mai gellt ok as de Maand vun de Leevde, un se kümmt nich to kort: Se [kennt keen Gesett](#), sleit achterrücks to – un swupps [büst op Hochtiedsreis](#)! Dat Öller speelt dorbi keen Rull.

In de Politik is Behrend Böckmann wedder heel präsent – bi so ünnerscheedlich Themen as [Wahlrummel](#), [PR-Albernheiten](#) un [vegane Fischbrötchen](#). Bavento hett he noch en besünner Fest in düssen Maand wördigt: den 75. Bortsdag vun't Grundgesett. (Nee, dat niege [Bortsdagsgedicht vun Billa Frerich](#) is nich fört Grundgesett!) Un wiess de ünnerscheedlich Landsverfaten vun de noorddüütschen Länner al lang op Platt överdragen sünd (woans schull een ehr sünst verstahn?!), geev dat dat Grundgesett vun de Bundsrepublik noch nich op Platt. Aver nu! Behrend Böckmann hett dat [in sien week-musikaalsch Mäkelborger Platt överdragen](#). Dat woor ja ok Tied!

Un denn stell sik uns' Behrend Böckmann ok noch de Fraag: [Wüllt de Russen Krieg?](#) Naja, den Verdacht kannst ja tominnst hebben bi de aktuelle Weltlaag... Addi Kahl vertellt uns, woans de [Musik em vör de berüchtigte "Swatte Pädagogik" reddt hett](#). Ok Meike Balzer-Fraun [dröömt mang de Feller vun en betere Welt](#). En [Rezept dorför kennt Rabbi Moses Ben Nachman](#) – översett hett dat vör Johren Rudi Witzke, de tiedlose Text stammt ut sien Nalaat. Un sünst noch? Dat giff [Limericks över frustreerte Wülf](#), [Versen över lustige Schiller](#) un [keen Aale](#). Kiekt Se sülven.

Een ernstes Woort will ik nu nochmaal mit Se un Juuch snacken, leve plattdüütsche Frünnen, Lesersche un Lesers. Wat is dat mit de Natuurbidräg?! Ik weet, dat de heel geern leest warrt, man nümst nich schickt mi welk! Dorbi giff dat so veel to sehn, överall in Goorns un Woolden un ok in de Stadt! De Tieden, as Anke Nissen un Antje Heßler dor den Laden smeten hebbt un dat Flack jümmers vull weer, sünd nu ja vörbi. Un wenn nich mal en beten Leven mang Juuch – ja, Juuch, leve Frünnen! – kümmt, denn warrt ut dat Natuur-Flack ok so'n Museum as nu al ut de [Computerie](#). In'n letztern Fall is dat mien Schuld, ik weet;

avers Plattpartu is en Mitmaaksiet! Also maakt mit! Ik frei mi över jedeen Aart Tosennen – opleevst Text un paar Fotos. Ok heel Kortes is willkommen – as Natuurnotiz. Truut sik, leven Lü!

So, nu heff ik mien Hart Luft maakt. Wi leest uns wedder in'n Julimaand. Hefft Se en wunnerbore Tied bet denn!

Nu de Linkliste. Op de Links bruukt Se bloots klicken, dat Se henkaamt.

Plattdüütsch Kunst:

[Dörch dat Johr: Vun Lent na Sommer](#). Versen un Vertelln vun Hans-Hermann Briesse (21.5.)
[Limericks för Mai](#) van Ludgerd Lüske (21.5.)
[Pingstboom](#). Van Ludgerd Lüske (20.5.)
[Notizen ut'n Nevelmaand](#). Fotos un Versen vun Marlou Lessing (20.5.)
[Finnst, glöwst, denkst du, dei Russen willen Krieg...](#) Lyriköverdragen na Jewgeni Jewtuschenko vun Behrend Böckmann (13.5.)

De Welt un Gott:

[To Pingsten: De unbekannte Gott](#). Andacht vun Marlou Lessing (19.5.)
[Leev geiht egen Weeg](#). Vun Berthold Cordes (19.5.)
[De Welt vun witte un swatte Tasten](#). Vertellsel vun Addi Kahl (19.5.)
[Gedanken an verleden Moderdaag](#). Vun Meike Balzer-Fraun (16.5.)
[Rabbi Moses Ben Nachman: Breef an sien Kinner](#). Översett vun Rudi Witzke (12.5.)
[Hochtiedsreis](#). Vun Silke Frakstein (12.5.)
[Himmelfohrt: Wi dröfft glöven](#). Andacht vun Marlou Lessing (9.5.)
[Ferientiet oder: Keen Tiet för Ferien](#). Vun Berthold Cordes (9.5.)

In't [Lütte Gebeedbook](#):

[Moderdag](#). Vun Marlou Lessing (12.5.)

Natuur un Wetenschap:

[Kunn dat nich allens heel eenfach ween?](#) Drömeree vun Meike Balzer-Fraun (29.5.)

In't [aktuelle Natuur-Notizbook](#):

[Niege Bekanntschaft!](#) Vun Marlou Lessing (21.5.)
[Hüüt keen Aale!](#) Vun Thomas Seemann (16.5.)

Wat in de Welt vörgeiht:

[75 Johr Grundgesetz. Dei iersten 19 Artikel von uns Grundgesetz up Platt](#). Vun Behrend Böckmann (19.5.)
[Wahlrummel](#). Vun Behrend Böckmann (13.5.)
[MV tut gut – MV wau \(#MVwow\)](#). Vun Behrend Böckmann (13.5.)
[Stell di vör...](#) Vun Marlou Lessing (5.5.)
[Den Fischsemmeldag fiern](#). Vun Behrend Böckmann (5.5.)

In't [plattdüütsche Notizbook](#) vun Marlou Lessing:

[Menschliche Schutzschilde?](#) (26.5.)
[Danke, AfD!](#) (23.5.)

För Kinner:

Modder Sünn ehr Kinner: [De Steernblomen](#). Märken vun Sophie Reinheimer, överdragen vun Klaus-Dieter Tüxen (25.5.)

Platt to Hand:

[För en Fründ to'n Bortsdag](#) vun Sibilla Frerich (26.5.)

Hartlich grööt

Marlou Lessing un dat lütte Plattpartu-Team